

L'istorgia sco rom d'instrucziun

Students da Losanna pretendan debatta

DA GUIU SOBIELA-CAANITZ

■ **Il cussegl grond vadais e ses Departament chantunal da furmazion, giuventetgna e cultura (DFGC) han reducì il spazi da l'istorgia sco rom d'instrucziun en la secundara (10avel ed 11avel onn da scola).** Duas periodas emnilas eran fin ussa deditgadas a lez rom. Uss èsi mo pli ina perioda e mesa; per la paja survegna il rom «etica e culturas religiusas» (ECR) ina mesa perioda, e la nota correspundenta vala per omadus roms. La reacziun da Séverin Yersin, parsura da l'Uniun da students d'istorgia da l'Universitad da Losanna (aesr@unil.ch) pon ins leger en la gasetta dal di «Le Courier» (Genevra) dals 4 da november 2015 (p. 2). Yersin commentescha:

Il passà en nossa vita

«In'otra pussaivladad fiss da prender temp per discutir davart il spazi da l'istorgia a scola. Ina tala discussiun chaschunass in'otra davart il spazi da l'istorgia en nossa societad insumma. Nus tgirain in patrimoni, capacitads, tradiziuns ed in'identitad, tut quai imprimì en il temp. Lezzas ragischs vegnan menziunadas ed evocadas tar mintga votaziun e mintga debatta (...). L'istorgia occupa in spazi impurtant en la vita da mintga burgaisa e burgais da la Svizra (...). Il public vul enconuscher l'istorgia. Quai mussa il success da romans e films istorics, dals magazins, d'emissiuns da televisiun e radio, da monuments e museums, da cudeschs e retschertgas academicas. L'istorgia occupa var tschintgtschient persunas che studegian, doctoreschan u doceschon a l'Universitad da Losanna; quella cifra crescha (...). La scola duai intermediar las tesas centralas da-

vart l'istorgia da nossas societads; (...) ella duai pussibilitar a mintga uman d'enclerger ils engaschaments dal passà e perfin ils discurs en chausa (...). In na dastga per exempel betg preschentar la fin da l'imperi roman sco consequenza da las 'invasiuns barbaras'»

Dal reginam burgognais al «francoprovenzal»

Quai fiss in cas tipic da falsificaziun istorica. Ils «barbars», pia ils pievels germans penetrads en la Gallia romana, han simplamain profità da la fin da l'imperi per fundar agens reginams. Il 1997 han umans spezialisads en la perscrutaziun dal temp medieval publitgà ina vasta sintesa dals resultats cuntanschids davart ils «pays romands»*. Quel volum da 455 pp. stat a disposiziun a tgi che vul savair dapli davart la genesis da la Svizra francofona. Areguard ils Burgognais pon ins leger: «Il general roman Aetius (...) ha stabilì quella populaziun germana en in tschess numnà 'Sapaudia' e furmà da las 'civitates' da Genevra, Nyon ed Avenches (...). Ins calculescha il pli savens che quels immigrads sajan stads strusch 25 000 (...). I han profità da la fin successiva da l'imperi roman per stgaffir in reginam independent cun duas chapitalas, Genevra e Lyon (...). Quel pievel ha surpiglià plaun a plaun la lingua latina (...). Ils Galloromans furmavan la maioritad da la populaziun; perquai ha lur lingua sa fatga valair (...). Nus discurren franzos en la Romandia perquai ch'ils dus pievels han sa maschadads mantegnend il latin» (pp. 31–35). En il 15avel e 16avel tschientaner ha Berna conquistà il Vad galloroman ch'è pia vegnì ina minoritad linguistica. Il franzos n'è dentant betg stà il successur direct dal latin:

«Aifer l'intschess galloroman appartegna la pli gronda part da la Svizra dal vest ad ina regiun da transiziun tranter il franzos ed il provenzal [occitan] ch'il romanist Ascoli ha numnà 'francoprovenzal', cun in center situà a Lyon. Mo la pli gronda part dal chantun Giura e dal Giura bernais fa part da l'intschess dialectal da la Franche-Comté, orientà vers il franzos» (p. 395). Oz din ins savens 'arpitan' empè da 'francoprovenzal'.

Il passà gida a chapir il mintgadi d'oz

Yersin concluda: «Ins n'astga betg minimisar l'influenza da las sferas economicas svizras durant omaduas guerras mundialas. Studegiar l'istorgia pussibilitescha plinavant da guardar il mund d'oz cun in'egliada differenta. Tut n'era betg adina sco oz, ma ils problems restan ils medems tras ils tschientaners: Cumbats da pussanza, svilup economic, dumondas d'existenza, crisas euv. Analisar tut quai cun nossa distanza d'oz pussibilitescha d'enclerger co ch'i funcziunava. Perquai, en fatscha a la decisiun dal cussegl grond e dal DFGC, han ils students d'istorgia da l'Universitad da Losanna inoltrà ina petiziun: Ins duaja suspender la decisiun da colliar l'instrucziun istorica e quella d'ECR e metter ad ir ina discussiun raschunaivla en chausa. Las autoritads vadaisas n'han betg respundì. Studentas e students giavischan pia ina debatta publica: Duain ins eliminar l'instrucziun istorica u renconuscher sia impurtanza en noss mintgadi?»

* Agostino Paravicini Bagliani, Jean-Pierre Felber, Jean-Daniel Morerod e Véronique Pasche (ed.), *Les pays romands au Moyen Age. Losanna (Payot, ISBN 2-601-03190-5) 1997.*